



14  
1548  
23

23



14  
1548  
23

履 金 石 跋  
齋 鐵 齋

光緒戊寅九月  
滂喜齋關雕

昭和八年  
三月廿八日  
購

1548  
28

氣

髮喜齋開韻  
火燄丸寅氏月

金  
司  
魁

頤  
魁  
齋

金石家言自歐趙洪薛以來至我

朝而極盛保庸黜陋寡聞於此事無能為役顧生平師友

問如阮芸臺相國朱芑堂尚書蔣伯生大令翟文泉進士  
龔定盦禮部諸君子皆獲接其人讀其書上下其議論輒  
用自愧又自豪也不圖今日復於韓君履卿得之君負幹  
濟才宦山左有年不四十遽引歸閉戶仡仡惟搜羅考訂  
之是務而拾遺補闕於吾大江南北尤多此其立志之卓  
用心之勤詎出歐趙洪薛下第聞之漢儒云賈君精而不  
博鄭君博而不精宋人亦云貢父學博永叔文工以古例  
今兼長罕觀乃今讀其所著金石文跋尾二卷約而能賅

字

清而不俗中間如周登叔簋銘漢敦煌太守裴岑紀功碑  
唐右鷹揚衛溫陽府印等跋皆援據詳明斷制確鑿而宋  
王一娘造橋記及明長史王公墓志二跋尤為議論正大  
有關風化既精且博而文尤工蓋其難也 保庸 自惟所言  
不足為此書重朱蔣二公逝矣文泉天各一方晤言匪易  
阮相國龔禮部皆君所善且一水可達請更以此書質之  
道光二十一年歲次辛丑三月丹徒嚴保庸撰

題詞

董國華

白雲山人抱古癖墨香一室光玢綸自編金石踵歐趙摩

抄手閱三千春

曾登佛地訪唐碣曾歷荒原拓爨碑 此二碑予得之滇中 萬里歸來

此長物待搜敝笥佐君奇

潘曾沂

白雲觀易知井福世上五經徒紛綸元朔皇慶壬子後行

惻寒泉六百春 獅林寺前井闌一面有皇慶元年重建等字向來未見也

幾時同謁蓬壺洞有夢先尋蜥蜴碑若把澄師比行肇石

盆不抵七泉奇 嘗夢得古篆石名曰蜥蜴碑又夢瀆井得古泉七枚皆有文曰行肇

潘會綬

博雅允推古君子時于搜討見經綸一名一物總地寶會  
著土中千百春

前人易使後人惑如讀泰山無字碑瑣瑣欲刊史家誤直  
令朽腐化神奇

寶鐵齋金石文跋尾卷上

元和韓人崇

登叔簋銘

右登叔簋蓋其器已失以今布帛尺度之高二寸五分深  
一寸口長四寸三分濶六寸五分以市權秤之重一斤十  
有五兩銘十三字首一字剝蝕不可辨曰口登叔作顯簋  
子子孫孫永寶用登字古文見齊侯罇鐘諸簋銘欸有云  
寶簋旅簋饗簋者此云顯簋取顯揚之意簋字博古攷古  
及先秦古器記鐘鼎欸識諸書皆釋為敦其實卽簋字也  
說文解字簋從竹從皿從皀此第六言之皀卽皀字古之

簋或以竹或以瓦故竹皿並用此省竹皿而從支象手形也上作屋室形者明其爲宗廟器也此器爲從孫仁山孝廉物三代吉金不可多見有文字者尤爲難得識者可不寶諸

周穆王壇山刻石

右吉日癸巳四字相傳爲周穆王書在正定府贊皇縣山中皇祐中宋祁搜獲之縣令劉莊鑿取歸州權郡事李中祐龕置廳壁宋人施宿以爲州廳舊石政和五年取入內府今贊皇廳壁所陷者乃覆本也而大瓢山人以爲石質麤頑確是三代間物施宿之言得之傳聞不足信是本爲陶觀察樑守正定時拓贈氣概雄遠筆力圓勁當不在石鼓下歐陽公言物有可樂不必辨其真僞余於此石亦云

泰山秦篆殘石

右泰山秦篆云斯臣去疾昧死臣請矣臣十字內斯昧死三字僅存其半吾友常熟蔣伯生因培於嘉慶二十年令泰安時在岱頂玉女池中搜出二石嵌置寶斯亭一時同人題詠爲墨林快事今伯生已歸道山山左道古之交如陳貞白張祿卿朱季直輩先後徂謝僕亦衰病侵尋萬事不挂心眼惟於書畫金石翫索不能釋手每念當時同志零落山阿不禁掩卷愴然耳

秦嶧山石刻

右嶧山石刻至元癸巳東平李處巽摹刻於應天府學橫石每行三字與泰山頌同列郡庠至明萬曆時逸失大半教授曹育賢命工重勒釋山原石既燬後世翻本有七陳思孝以長安本爲第一應天府學爲第四是刻又重摹李本愈遠而愈失其真然古刻之在人間者日亡日少遇虎賁之似得不奉爲典型耶

琅邪臺刻石

右琅邪臺秦篆十一行第一行從臣姓名存五大夫楊樛一人次行皇帝日以下十行石理剝落文多漫漶按嬴秦石刻著名傳世者會稽嶧山泰山琅邪臺四種而已會稽最先亡失嶧山遭火焚燬泰山存廿九字至

國朝亦遭劫火嘉慶間搜羅殘石僅存十字琅邪臺二面臨海風燥日炎最難搃拓向游東省覓得數紙皆爲同好索去此本爲汪別駕韻樵所贈雖出近拓字跡漫滅遠不如阮宮保精拓之十三行然來處不易得不奉爲墨寶耶

漢敦煌太守裴岑紀功碑

永和二年八月

右裴君紀功碑無額六行行十字巴里坤西安府皆有覆本諸家辨證王司寇萃編言之詳矣按紀文達公如是我聞載此碑云在巴爾庫爾城外海子上海子爲冷龍所居

城中不得鳴夜礮夜礮一鳴則冷龍振動天必奇寒所謂海子者漢之蒲類海也當時吏民建祠刊石于海子之上故云立海祠德字之譌不攻自破矣

漢司農劉夫人碑

右漢司農劉夫人碑爲錫山錢梅溪叅軍舊藏本文云司農夫人祖自會稽山陰姓劉氏伊述夫人受持貞剛體性純淑非禮不行云云下多漫漶文難貫穿漢司農許馡字季軼劉夫人其配也許官至太尉按吳處厚青箱雜記云義興有許馡廟其碑許劭所作唐開元中諸孫重刻碑陰有八字云談馬礪畢圭田數七識者謂許碑重立四字可知原刻久佚唐時重摹之石今亦無存文載洪景伯隸續標題一行存漢故二字此錢氏拓本所無明初盧公武常得舊刻云自伊述夫人以下合有四言二十五韻今所存剛行同房容宮香藏鄉忘可考耳

梁許長史舊館壇碑

天監十五年

右許長史舊館壇碑陶隱居撰第一行廿四字隱居自書碑文出弟子孫文韜手原石在茅山玉晨館燬於明嘉靖間江左流傳僅見爛溪潘氏本寰宇訪碑錄載鄞縣范氏拓本而覃溪閣學復初齋詩集中有范氏天一閣訪館壇碑不可得詩則海內無別本流傳矣國初顧亭林朱竹垞



徐壇長楊大瓢諸家跋語皆爲稼堂先生作惜乎親書冊尾者獨大瓢一跋餘皆散見集中今爲盛澤顧蘭畦所藏出以見示觀其用筆方整峭厲實開歐褚之先聲一洗六朝險陋之習此一行隱居手自書之上隱約得佛記二字爲濃墨塗抹不解所謂諸家亦未有論及者尙俟好古多聞之士審定焉

北齊崔府君墓志

右齊崔府君墓志褚仙根茂才得於中州文義可誦正書峭整有法無險怪之習崔府君名顧爲尙書僕射貞烈公崔亮之孫涇州刺史崔士和之子位卑年促魏書不爲立傳幸存片石不致名姓翳如留心金石文字者亟宜採錄也

唐右鷹揚衛溫陽府印

右唐官印銅鑄方今營造尺一寸八分厚四分橋紐高七分重今平七兩七錢文曰右鷹揚衛溫陽府之印三行行三字背刻正書如印文分左右兩行大半爲青綠所食可辨者右鷹溫陽府印六字而已篆文屈曲與唐雞林道經略使印同按唐初設十六衛爲府兵仿古寓兵於農之意新唐書百官志武后光宅元年改左右武衛曰左右鷹揚衛又兵志載隋時驃騎車騎二府皆有將軍後更驃騎曰

鷹揚郎將車騎曰副郎將此印文曰右鷹揚衛不曰郎將定爲光宅所改非隋時舊制也又考通典左右武衛正三品大將軍一人將軍各二人大唐光宅元年改爲左右鷹揚衛神龍元年復爲武衛光宅至神龍廿一年此印爲武后時所鑄無疑又載貞觀十年採隋折衝果毅郎將之名改統軍爲折衝都尉別將爲果毅都尉其府多因其地各自爲名凡五百七十四府分置於諸州而名隸諸衛兵滿一千二百人爲上府千人爲中府八百人爲下府又按唐六典武衛大將軍下長史各一人掌判諸曹副府及鳳亭等四十九府之事中郎將各一人掌領其府校尉旅帥副衛之屬以宿衛而總其府事溫陽則地理志同州二十六府之一也此印爲掌府事之長史中郎將所用非將軍印明矣

茅山華陽觀王先生碑

乾封二年

右王先生碑朝散大夫行江寧縣令河南于敬之撰琅邪王元宗書王先生名軌字洪範一字道模琅邪臨沂人爲王遠知弟子卒於乾封二年十一月年八十有八弟子戴慧恭等耐葬於陶隱居墓右立碑其上楷書字徑五分縱橫皆有界線結體似館壇碑有六朝氣骨向爲孫北海曹秋岳所藏剪裱本行款字數不可紀碑石不知毀於何時

其目見於金石錄寶刻類編輿地碑目天下金石志

尋山館仙壇山銘

聖歷三年

右仙壇山銘在溧水縣南門外四十二里尋仙觀中正書十六行行十八字字徑寸許文云道士宋文幹字上仙以大唐垂拱五年因此石自然形似修立仙壇三所長壽元年縣令王通遂以仙壇名鄉奉仙號里逮聖歷二年縣令岑仲琢石爲象云云欸云道士周道賜書畫無撰人名氏上方鐫天尊像旁列龍虎書畫出一人之手爲古刻所僅見字體方正古厚爲初唐精品按岑仲鄧州人中書令文本之孫有政績昆仲皆作令江南咸有聲譽宰相宗楚客屬監察御史曰勿遺江東三岑事載名宦傳此碑載歐陽公集古錄王象之輿地碑目陳思寶刻類編原石完善爲江左唐刻之最而近年寰宇訪碑錄及萃編皆不載可見古刻之遺於目前者不少也

唐立晉建安太守史憲神道碑

景龍四年

右建安太守史憲神道碑在溧陽北門外十六里埭頭史壯侯墓前正書三十行大半磨滅字數不辨碑額正書五字惟一碑字可識按復齋碑錄晉建安太守山陰侯史公神道碑從孫疑撰從孫處權書景龍四年二月立在溧陽此碑撰文紀元一一符合書人已全泐顛有碑錄可攷四

年縣志誤作三年未改唐隆以前仍稱景龍不得謂景龍無四年也此碑銘詞載孫觀察續古文苑

唐雍州長安縣丞蕭府君墓志銘

景雲二年

右蕭府君墓志中大夫行薛王友顏惟貞撰國初出西安府城南神和原土中正書廿六行行廿六字石方尺五字徑六分蕭府君諱思亮字孔明蘭陵人也解褐補益州金堂縣尉歷官至長安縣丞以景雲二年正月三十日終於京崇化里第春秋六十有七是年二月窆於神和原夫人譙郡能氏景龍二年九月十一日寢疾而終云云按顏氏家廟碑魯公之父惟貞字叔堅受筆法於舅殷仲容以草隸擅名此碑字畫秀挺當爲惟貞書惟貞書武承規墓志與此相類能姓見唐書孝友傳序有能君德鄭縣人其他不多見也

季子廟碑陰記

開元十年

右季子廟碑陰記正書十五行字徑寸許左角斷缺百餘字每行字數不可記在丹陽季子廟中撰書人及年月磨滅不辨中有紹以開元十年壬戌巡屬縣謁廟立碑等語其爲唐刺史名紹者所立無疑此爲碑陰惜正面文字不可得而見矣

崇勝寺丁思禮造像

天寶八載

右丁思禮造像在沛縣之夏鎮與山左滕邑接壤爲江左  
石刻之最遠者碑分四截上截佛像五區心經十八行行  
十七字次截記文十六行行十九字三截五行皆僧尼題  
名下截十六行行八字至十一字不等碑側三行貞元十  
五年夏侯贊題名紀年一行大唐天寶八載十月廿一日  
豎字畫清明不審萃編何以誤作大曆

唐延陵季子廟記

大曆十四年

右延陵季子廟記在丹陽城外九里嘉賢廟中首行云改  
修吳延陵季子廟記前試大理司直張從申書信都魏清  
海鐫末行時大唐大曆十四年歲己未八月戊戌朔廿七  
日甲子正議大夫使持節潤州諸軍事守潤州刺史上柱  
國賜紫金魚袋新拜口書戶部侍郎蘭陵蕭定字梅臣  
記篆額改修吳延陵季子廟記九字字徑七寸仿孔子十  
字篆法不著名氏疑卽從申筆也文二十行行三十字文  
字完善惟每行末一字殘闕刻者題名於前撰者書字古  
刻中僅見也

晉周孝侯碑

元和六年十一月十五日

右晉周孝侯碑平原內史陸機撰右軍將軍王羲之書在  
宜興孝侯廟中石分六截每截三十七行行九字篆額重  
刻晉周孝侯碑七字按此碑唐元和六年義興縣令陳從

諫重樹原石世無傳本重摹之石至明中葉漫漶已甚邑人吳馭得宋拓唐石舊本屬周公瑕摹刻鈎勒精善不失右軍遺意而跋語細字已有一二磨滅處矣

張孝子祠殘碑

建中 年

右碑在句容城內義臺僅存殘石一角可辨者百餘字撰書人及年月皆磨滅無考按張孝子名常洎字巨川父璋建州司戶父歿廬墓三十六年有芝鶴之瑞貞元五年李泌宣策褒美特建義臺唐宋元人碑銘贊記不一而足磨滅之餘僅存此片石耳此碑建中時縣令呂僊所立故末行有其名碑側又有咸通十年題名歐陽公集古錄所收旌表碣係貞觀五年另是一碑已云文字僅可髣髴惜其將遂不見於後世者古之情令人亦何以異哉

華陽三洞景昭大法師碑

貞元三年正月

右景昭大法師碑朝議大夫檢校國子司業兼御史中丞吳縣開國男陸長源撰朝議大夫檢校尙書兵部郎中兼侍御史上柱國竇胤書并篆額在茅山玉晨觀正書廿五行行五十六字篆額陽文有唐華陽三洞景昭大法師碑十二字額下有穿左右刻弄玉簫史四字驗其筆意亦出竇胤手是碑集古錄目金石錄皆不載僅見於復齋碑錄及金石略中竇胤字靈長扶風人司業蒙之弟篆隸精深

著述書賦陸長源字泳吳人贈於學官至御史中丞宣武司馬

唐淮南節度副使田府君墓志

貞元三年四月四日

右唐田府君墓志左衛率府騎曹參軍桑叔文撰右金吾兵曹參軍儲彥琛書其石四方寬一尺五寸行書廿三行行廿二字道光丙申正月揚州灣頭鎮洽河出之土中完善無缺爲江都梅植之所藏田君名旻唐書無傳曾祖名宏皇其夫人志中作宏唐田君生年一書五十有一一書五十事隔九年撰文一手已舛錯若此史傳之生卒年月益不足盡信矣

唐龔夫人墓志銘

貞元十年五月

右唐龔夫人墓志刻于方磚康熙年間于將坊居人造屋發土得之今歸吾里顧氏夫人祖諱黃頭此種名字相沿六朝舊習取黃髮黃耆之意前年真定出土唐賈夫人墓銘末一行有劉黃頭名字亦此類也敦海敦字不從力從攴見史記河渠書入于敦海漢書武紀軍臨敦海及大宋敦興頌敦字說文所無廣韻云敦卒旋放之兒子虛賦殷姍敦窳顏注謂行于叢薄之間也敦窳卽敦卒是敦與勃通

唐沙門澄觀造井題字

元和六年

右造井題字文云維唐元和六年歲次辛卯五月甲午朔十五日戊申沙門澄觀爲零陵寺造亭作石井欄并石盆永充供養以偈贊曰此是南山石將來造井欄留傳千萬代各結佛家緣盡意修功德應無朽壞年同霑勝福者超于彌勒前正書字徑三寸廿一行行五六字不等剝蝕已甚非細視不辨在溧陽縣報恩寺中卽古零陵寺也寰宇訪碑錄金石萃編俱失載

唐使院新修石幢記

元和十二年九月

右使院石幢記支度副使檢校司封郎中兼侍御史高瑀撰節度判口口御史內供奉譚藩書爲徐州刺史李愿立也幢八面高六尺七寸廣九寸面三行行三十八字在銅山縣記文之後列屬官姓名十九人內節度掌書記王參元爲王茂元之弟栖曜之子李玉谿代王茂元遺表云與弟參元俱以詞場就貢久而不調柳柳州有賀進士王參元失火書攝觀察推官鄭據見全唐詩云滎陽人官右龍武軍長史又與碑文不合也

普惠寺井闌

泰和元年

右普惠寺井闌題名文云大唐泰和元年蔣詮喜捨在江寧水西門外普惠寺嚴子進金石記所未載也

唐焦山題名

大和八年



右題名正書兩行文云大和八年十一月劉崇曹口在雷崩石水中半埋于土前人罕有津逮而摹拓者道光甲午海昌僧六舟乘江水退時搜訪古跡始椎拓以顯其好事樂古可與張力臣竝傳矣

唐邵府君墓志

開成元年十一月廿七日

右唐邵府君墓志正書漫漶年月不可辨文刻方博首行唐故邵府君墓志銘次行君諱咸字文立雁門郡人也第八行夫人范氏生子六人第十行葬於長洲縣依仁鄉餘皆磨滅不可識讀藏嘉定瞿木夫叅軍家

唐佛頂尊勝陀羅尼幢

會昌二年

右陀羅尼幢在洞庭包山寺前沙門契元書字徑二寸完善無泐下方羅列施王姓名契元名不著于書史而楷法雄麗頗似張從申季子廟碑成都雍博士陶有送契上人南游詩卽其人也

善權洞唐人題名

大中四年

右唐人題名姚勗至鍾離權十人人各一行末題年月計篆書十一行在宜興善權洞中嘉題名行書卽于空處插入大小高下俱無定準字多漫漶不辨世傳雲房先生書惟此與邢臺縣詩刻然邢臺爲宋元重鏤又不若此題名之爲原石耳

唐萬夫人墓志

大中六年

右唐萬夫人墓志文云有唐大中六年十二月十三日豫章郡萬夫人終于揚州江都來鳳之里年卅九爰自笄年歸于閻氏之室育三男一女卽以當月廿四日窆于揚子縣界江濱鄉白社村云云刻於磚上字大徑寸蓋題萬氏夫人墓志六字歸於閻氏之室而不著其名村俗人所鮮不識體例也磚藏揚州士人家按江都縣唐永淳元年分置揚子縣卽今之儀徵也

尊勝陀羅尼經幢

大中八年

右尊勝陀羅尼真言并讚在元和縣甫里保聖寺末題大唐大中甲戌歲秋幽月中元日建進士崔渙字穎枝書并撰讚旁有正書三行宋皇祐五年任持沙門惟吉等重立題記書法精整字大寸餘八面刻之此本係百餘年前舊拓文字年月貫穿可誦然讚語已磨滅不辨矣近日斷爲三四零落田間徒供牧豎敲火而已

隴西李府君墓志銘

咸通四年

右唐故隴西李府君墓志銘鄉貢進士馬郁撰府君名扶三世皆高隱不仕以咸通四年六月廿九日終於里第享年六十九嗣子鈺夫人劉氏周氏明年二月十三日卜葬於縣之宜陵鄉白露里之原其石四方文廿九行字數不

等無書人姓名道光戊戌冬月泰州城西張家莊土人犁  
田出之唐刻之存於世者日亡日少而此完善無損尤足  
重也

寶鐵齋金石文跋尾卷中

元和韓崇

唐道德經幢

廣明元年

右道德經幢道光丁酉歲泰州修葺城垣董事尤柳村得  
斷石一段于土中識讀文字乃道德經正書字如指頂大  
情破碎不全其製八面文字周遭乃經幢也末有廣明元  
年十一月建一行石之上口有凹處蓋受牡者下口有牡  
乃全幢之一段故字不全廣明爲僖宗第二改元歲在庚  
子僅一年金石文字絕不可得是刻現藏夏退庵六客廬  
中

唐潘城道場碑 中和三年

右唐潘城道場碑鄉貢進士劉驩撰巨唐中和三年癸卯  
歲秋七月乙丑朔十五日己卯立樵夫丹陽郡陶貞固書  
并篆額其目載輿地碑目及復齋碑錄云唐潘城寺碑進  
士劉驩撰陶貞固正書在溧水按縣之東北十二里周末  
有犂姓結廬其地漢明帝時有僧搆室誦經名潘城道場  
碑石不知何時沈沒泰州夏退庵荃爲高渚校官時搜得  
之篆額已失碑首斷一角缺六十餘字文廿五行行四十  
三字文尙可誦字體亦方整有法爲唐刻中精品也

唐戴公碑

右唐戴叔倫神道碑文字漫滅不可辨惟碑額正書唐故  
戴公神道之碑八字完善在金壇縣南門外屹立道中碑  
末有李都轉彥章題名傍一碑大書詩伯夜臺四字按縣  
志經略使戴叔倫墓在縣南三里翰林學士梁肅撰惟唐  
故戴公神道之碑數大字存餘不可辨明萬曆四十六年  
知縣事張翰冲題其墓曰詩伯夜臺考唐書列傳戴叔倫  
字幼公金壇人蕭穎士弟子貞元中及第劉晏薦爲主運  
湖南歷撫州刺史容管經略使所至治行稱最卒年五十

八

唐米氏貞女墓志銘

右米氏貞女墓銘石方尺許正書十五行行十五字無書  
撰人姓氏蓋題米氏女墓志銘六字志石出土時裂爲兩  
截道光辛卯江都沈生自新城東郭外新莊土人家獲得  
志石下半截其上截及蓋又展轉訪得之字畫漫漶過半  
按稱貞女者志文云長及笄年未媾故也又云終于江陽  
縣布政里之第葬于城南弦歌坊之平原今志乘俱失載  
按唐書地理志云貞觀十八年析江都置江陽今故治已  
不可考媾古聘字說文媾問也廣韻媾娶也左思蜀都賦  
媾江妃與神游樊敏碑再奉朝媾皆作媾其尤古者見荀  
卿書

尊勝陀羅尼幢

右經幢八面末題云弟子司馬閩製造于開元寺丁巳正  
月二十八日高不過八寸字小如豆絕無剝泐經幢中之  
精品也向在開元寺不知何時失去今歸嘉禾張叔未孝  
廉但有年月而無紀元按東漢以下始以甲子名歲然必  
先以某元某年繫之嗣後日趨簡便祇書甲子而不繫元  
如瘞鶴銘但書壬辰歲甲午歲陶隱居著真誥亦但云己  
卯歲此幢亦其例也

吳尋陽長公主墓志銘

乾貞三年三月

右吳尋陽長公主墓銘將仕郎福州閩縣丞危德興撰正

書三十七行字數不等石方三尺無一字磨泐乾隆中江都縣村農掘地得之乾貞三年卽太和元年爲後唐明宗天成四年也公主爲吳楊行密之女嫁舒州刺史劉公志中不載劉公之名其長子次子官職名氏俱不見于史

南唐龍興寺鐘銘

乾德五年

右龍興寺鐘銘在南昌府城內百花洲西鐘樓上正書十五行行廿一字字徑寸許首題安邊忠武功臣宣猛將軍前守池州刺史池州團練使甯化軍節度副使在城馬步都軍使知揚州軍府事武信軍節度使鎮海軍節度使甯國軍節度使建武軍節度使守左神衛軍統軍本軍都軍使國城都城修開城濠都檢校使武昌軍節度使兼營屯使靜江軍節度使知南都留守檢校太尉兼侍中南昌尹開國侯食邑一千戶林仁肇捨俸錢重鑄龍興寺銅鐘一口永充供養末行題唐乾德五年太歲丁卯二月庚申朔二十五日甲申記攷林仁肇建陽人仕閩爲裨將沈毅果敢軍中謂之林虎子閩亡唐元宗拔爲將官至南都留守宋廷臣忌其威名用計間之飲酖而死

吳越王龍簡

右吳越王龍簡正書十行凡一百七十又九言楷法絕似麻姑壇記其質白金重二十兩以今布帛尺度之高五寸

六分廣三寸七分周刻一龍上雲下水文云大道弟子天下都元帥尚父守中書令吳越國王錢鏐年七十七歲二月十六日生末云謹詣太湖水府金龍驛傳于吳越國蘇州府吳縣洞庭鄉東皋里太湖水府告文云云順治元年夏吳中大旱太湖龜坼居民于湖底得之惜其時有願以白金倍重相易不可卒歸銷鎔拓本流傳等于球壁矣

雙塔寺石柱題字

右石柱題名在雙塔寺大殿東西兩

柱雕鏤精工

遍刻人物花草爲人摩挲其光可鑑東柱下蓮花瓣內正書題名云宋宣男居厚卿陳文炳捨錢壹百貫置柱保安家眷莊嚴福慧廿四字四行行六字西柱下鏤捨錢壹百貫文足一行正書無年月姓名與東柱題名出一人之手楷法端勁有顏柳風骨相傳爲宋雍熙中王文罕建塔時所立似屬可信

宋閔君墓志

大中祥符五年

右閔君墓志首題大宋蘇州長洲縣平原鄉魯國閔君墓銘孤子仁度書次行云孤子閔仁度將葬嚴君賞家謙致請錢唐浮屠氏居簡爲文誌其墓閔君名榮東吳人也配顧氏長男曰仁度次曰仁禹不仕奉佛力行善事以大中祥符四年五月微疾而逝以明年壬子歲二月八日卜葬

于長洲縣彭華鄉封橋官塘西俞氏之地兄弟夫婦同葬  
一處合家孝友於此可見文刻方石十九行字徑半寸正  
書四周鑄水波紋按宋僧居簡字敬叟嘉熙中住淨慈光  
孝寺有北澗詩集此志墓之居簡年代不合別是一人楓  
橋作封橋按豹隱紀談云舊作封橋因張繼詩相承作楓  
今天平寺藏經多唐人書背有封橋常住字

吳江報恩寺題名殘石

至和元年

右宋人題名六行行八字字徑四寸首尾缺失文不貫串  
可誦者至和元年試秘書郎劉孜叔懋左班殿直杜慄遠  
之數字而已在吳江縣屯村報恩寺中按中吳紀聞鄭毅  
夫嘗作垂虹橋詩寄劉孜叔懋時劉爲吳江尉亦有和篇  
皆刻之石鄭詩題云寄同年叔懋秘校乃原父之弟也杜  
遠之不知何許人尙俟續考

無錫縣學記

嘉祐二年

右無錫縣學記武寧章望之撰嘉祐三年五月一日立石  
題名自左而右承事郎守秘書丞知縣事騎都尉張銑將  
仕郎守主簿陳方將仕郎守縣尉范伯玉額題常州無錫  
縣學之記飛白書八字文正書廿三行行五十字字徑一  
寸按章望之字表民浦城人文簡公得象子官終光祿丞  
爲文辨博有集三十卷張銑濮州人垂崖先生之弟官至



虞部員外郎

宋王一娘造橋記

治平元年

石王一娘造橋記云當州長洲縣東吳鄉唐家橋東居住清信女弟子王氏一娘并男金守暹守良捨裝奩貨賣同建造石橋一座末題治平元年五月望日云云正書十二行行十字字徑寸許續題小字六行云本府長洲縣白公堤尼師道等發心重造功德報答生身父母之恩自身康泰者嘉定四年續題在虎邱同善堂火神殿壁間所造石橋不知何名大概在白隄左右宋元人造橋開井多爲追薦而作利人利己眞實功德不若近世爭延無賴僧道闕開酒漿虛糜金帛了無益於存歿也

唐興殿記殘碑

吳郡金石目附治平之末

右唐興殿記僅存上截十六行年月及撰書人皆不可考文中可辨者梁天監末始給寺額至道初朱仁幹復募緣造殿云云篆額唐興殿記四字文正書徑寸在嘉定安亭鎮菩提寺大殿壁間其陰刻菩提寺行在尙書公據按錢竹汀宮詹所記寺中古刻尙有治平建炎柱礎題字及淳祐四年菩提寺橋題記徧覓不得想柱礎更新時爲妄人鑿去橋柱亦因此遺失殘碣僅存得不視爲墨寶耶

韓魏公墓志

熙寧八年

右宋韓魏公墓志首題宋故推忠宣德崇仁保順守正協  
恭贊治純誠亮節佐運翊戴功臣永興軍節度管内觀察  
處置等使開府儀同三司守司徒檢校太師兼侍中行京  
兆尹判相州軍州事兼管内勸農使上柱國魏國公食邑  
一萬六千八百戶食實封六千五百戶贈尚書令諡忠獻  
配享英宗廟廷韓公墓志銘并序龍圖閣直學士朝散大  
夫尚書右司郎中提舉西京嵩山崇福宮上輕車都尉穎  
川郡開國侯食邑一千戶食實封二百戶賜紫金魚袋陳  
薦撰朝散大夫右諫議大夫充集賢院學士史館修撰宗  
正寺修玉牒官權判尚書都省判秘閣提舉醴泉觀公事  
上護軍常山郡開國侯食邑一千五百戶賜紫金魚袋宋  
敏求書河東節度使開府儀同三司守司徒檢校太師兼  
侍中行太原尹判大名府兼北京留守司事充大名府路  
安撫使兼大名府路駐泊馬步軍都總管上柱國潞國公  
文彥博篆蓋家藏裝本行欵字數俱不能紀按史傳陳薦  
字彥升從魏公定州河東幕府薦爲秘閣校理是以有公  
之故吏一語志中出處生卒皆與史傳合惟奏中貴廖浩  
然論安石不可相及垂簾時事詳于史而志不載蓋撰文者  
避當日忌諱耳魏公墓在安陽是碑存佚不可知拓本世  
不多見字徑五分楷法精整無一字磨滅其爲宋拓無疑

中間勁健作勁律雄健作雄建兩遺字作遣此不可解尙俟博洽者審定焉

蘇文忠黃茅岡詩刻并張天驥等題名 元豐元年

右蘇文忠黃茅岡詩七言古已刻集中題名兩行云元豐元年九月十七日張天驥蘇軾顏復王鞏始登此山在徐州雲龍山石壁上按張天驥號雲龍山人見放鶴亭記顏復字長道魯人顏子四十八世孫嘉祐中詔訪遺逸京東以復言試于中書考官歐陽修奏復第一賜進士爲校書郎元祐初爲太常博士改天章閣待制王鞏字定國魏州人文正公旦孫長於詩官宗正丞兩公皆從遊于徐贈答之詩皆可攷見題名非坡公手書或出定國或後八重摹詩中仰觀白雲天茫茫集作仰看當從石刻爲是

秦淮海墨竹詩 元豐二年

右秦淮海墨竹詩七言古一首云墨君欵題元豐二年上元日淮海居士秦觀計草書廿二行字徑寸許秦小峴司寇得眞跡勒石錫山祠中是詩不載淮海集而詞意高古狂草淋漓向爲式古卞氏所藏翁覃溪閣學跋語考證精確昔年游宦山左曾見眞本于東撫署中今復覩墨刻洵乎有墨緣也

眞身瑞像歷年記 元豐四年

右東京啟聖禪院真身瑞像歷年記上截刻梅檀佛像下  
截記文細楷三十一行字數不等文中敘佛像周歷各國  
年歲末題蘇州長洲縣上元鄉煙家橋西居住嗣男寶臨  
施財刊石追薦妣諸氏七娘遠年生昇元豐四年五月望  
日立石在郡城婁門內關帝廟中乾隆三十年乙酉族兄  
隱禪先生諱承詩于元旦日入廟瞻禮得此石于墻角剔  
去泥土供奉龕壁元豐迄今八百年留傳無恙豈無天龍  
呵護其中紀元叅錯詳潛研堂金石跋尾中

宋明長史王公墓志

元豐八年

右宋明長史王公墓志門人舒亶撰京兆杜侄書浚儀向  
宗諤題籤石方二尺正書二十行行三十一字額題宋明  
長史王公墓志八字正書其石在鄞縣庫中按題籤卽題  
額也爲古刻中僅見可補入墓銘舉例中王公名說字應  
求明之鄞人祖簡父昭文娶高氏再娶李氏五男筠叟瑜  
玩琦珩皆舉進士元豐八年八月八日卒于家享年七十  
有六明年三月三日葬于桃源鄉清泉里明有五先生前  
則慈谿楊君適杜君醇鄞王君致其後則奉化樓君郁與  
先生其人也先生以學教授鄉里晚歲始得一命爲州長  
史撰文之舒亶慈谿人神宗朝偕李定傾軋蘇文忠考其  
人不足取而文詞簡淨有法元豐迄今八百餘年其子孫

已不知墓所在道光己亥爲周姓盜賣與歙人江家俊發  
土見碑隱匿不報紳士鳴之官按律懲治古人志石埋幽  
具有深意自明中葉刊橫石陷置壁中殊非鄭重之道後  
之孝子順孫當力行古制庶能永存其父祖云

米南宮題名

元祐三年

右米老題名文云米元章陳文老劉巨濟戊辰暮春同遊  
字徑七寸三行行五字在陽湖縣南三十里延政鄉三渦  
溪文明寺寺爲唐大中五年建名緣果寺宋太平興國中  
改爲乾明後復改文明崇孝禪寺戊辰爲元祐三年南宮  
年三十八歲是刻爲呂堯仙太史搜剔而出前人未經著  
錄也按劉巨濟名涇簡州人舉進士王安石薦其才爲太  
學博士元符末除職方郎中

潤州刺史楊傑乞封吳季子疏

元祐三年

右宋潤州刺史乞封爵疏行書十行行二十二字字徑一  
寸五分相傳爲楊傑自書在丹陽嘉賢廟中按宋史本傳  
楊傑字次公無爲人舉進士元豐中官太常元祐中爲禮  
部員外郎出知潤州除兩浙提點刑獄年七十自號無爲  
子又書史會要載無爲子擅豪翰其蹟雜見羣玉堂法帖  
中

宋李氏夫人墓志

元祐五年

右宋故李氏夫人墓志銘權單州團練判官前鳳翔府教授吳矜撰新無爲軍判官知杭州仁和縣丞樓光書石方二尺正書十九行行廿二字與王先生墓志同出礮中夫人李氏其先壽春人曾祖遷爲明之定海縣宰卒於官子孫因家焉祖來章父閱皆不仕年二十歸于王先生說先生窮甚晚年始得一命夫人與之啜菽飲水白首相對裕如也元祐五年五月二十六日享年六十終於寢有子四人曰瑜曰玩曰琦曰珩以其年十二月十九日葬于鄞之桃源鄉清泉里耐先生之塋焉按先生長于夫人廿一歲夫人爲繼配是以年齒相懸先生有五男是碑僅載四人想筠叟非同產也原石爲江姓磨滅官中索之急別刻一石以應此二紙爲出土時所拓無絲毫剝泐錄其梗概以備留心金石文字者採取焉

宜興周孝侯廟記

元祐六年

右宜興周孝侯廟記鄉貢進士沃彥撰宜興縣丞劉明仲書并題額題名三人左奉議郎知宜興縣事兼兵馬都監周明之宜興縣主簿胡闔宜興縣尉李寬大宋元祐辛未歲正月望日立石正書廿一行行四十四字字徑寸三分額重修平西周將軍廟記九字正書在宜興孝侯廟中按沃彥宜興人應元祐丁卯鄉舉有文名周明之元祐四年

任王簿胡闔縣志誤作吳闔縣丞劉明仲縣志失載

宋中散大夫徐師閔墓志銘 元祐八年十一月

右徐師閔墓志蔣之奇撰黃履書章衡篆蓋正書四十行行四十五字其石正方約四尺許師閔為徐奭之子年六十餘以左中散大夫普寧郡侯致仕居蘇為蔣堂蔡襄所知在官自輔臣以下薦之者幾百人及退歸與元絳程師孟諸人詩酒相過號十老鄉人榮之年八十乃卒葬于吳縣燕山龍窩塢宋史無傳歌詩二十卷雜文十卷亦不載于藝文志

秦淮海賜研記 元祐八年 重刻本

右秦淮海賜研記楷書八行在錫山祠中云硯在鉅野李忠愍公祠堂內忠愍官詹事時太子所賜秦小峴司寇嘗得脫本摹勒祠壁按宋史文苑傳秦觀字少游一字太虛揚州高郵人登第調定海主簿蔡州教授元祐初以賢良方正薦除太學博士秘書省正字兼國史院編修官紹聖初坐黨籍削秩徙雷州徽宗立放還至藤州驟卒年五十有三百文集四十卷

宋露筋祠碑 紹聖元年 重刻本

右露筋祠碑紹聖元年十月米襄陽撰并書今在露筋祠內原石久佚清熙乙未虔亭瞿暉從真蹟摹刻置于郡丞

官舍詳載珊瑚木難其石亦已磨滅此刻係乾隆廿年揚州府楊重英重墓本道光己亥泰州學博夏退庵荃得一石於高郵橫石行欵字數皆同末行有吳門章表勒石小八分書六字大約明代所刊此石不知何時湮入運河康熙九年濬河爲高郵土人所得歸於孫虞橋吏部迄今百七十年又爲夏退庵所藏是刻自宋迄今重摹不一又屢見於法帖中可見善善有同心而貞烈之不可磨滅也

蔣魏公詩帖

紹聖二年

右蔣魏公詩帖首行云開園命客爲花下之飲東口文安國三口勾末行云紹聖乙亥八月十八日鎮洮帥府西齋書穎叔後有孫觀蔣璩兩跋橫石行書大小三十九行在宜興祠中按之奇字穎叔宜興人嘉祐二年進士哲宗朝累擢翰林學士徽宗朝拜同知樞密院事除觀文殿學士出知杭州提舉靈仙觀卒入黨籍此詩知熙汀時所書在紹聖二年嗣後陳紹述復官召爲中書舍人進龍圖閣直學士卒贈魏國公謚文忠孫觀字仲益晉陵人大觀三年進士政和四年中詞科高宗朝仕至戶部尙書蔣璩字宜卿幼孤鞠于世父魏公善爲詩魏公器重之賦詩曰渥注之駒必汗血青雲之幹飽霜雪云云以蔭補將仕郎官至侍郎守臨川告歸其名从玉不从火他書作燦者皆誤



朱樂園先生墓表 元符元年

右朱樂園墓表首題樂園先生之墓江淮荆浙等路制置從事米芾表文云朱氏名長文字伯原十九歲登乙科病足不肯從吏趨築室樂園坊有山林趣著書樂古薦起爲本郡教授太學先生擢東觀兼樞密屬元符元年二月丙申遘疾不祿享年六十子耜杭州鹽官尉耦耕舉進士以六月葬至德鄉之塋著書三百卷羣經有辨說樂園有集琴臺有志吳郡有續記又著琴史云云行書十五行字徑一寸餘在支硎山南峯墓上結體道勁奔逸與章吉老墓表相類米書中上乘也

茅山蓬壺洞石豫題名 崇寧元年

右題名在茅山蓬壺洞正書二行行八字左行文云崇寧元年正月九日瞻仰洞天作禮而去睢陽石豫自金陵來按石豫字安正宜陵人爲轉運判官天發神讖碑後有跋語數行亦崇寧元年題也

虎邱賀方回題名 大觀二年

右題名五行在虎邱劍池文云賀鑄王防弟枋蘇京姪餘慶大觀戊子三月辛酉正書徑四寸年月差小左行讀之新舊虎邱志俱未載按賀鑄字方回衛州人孝惠皇后族孫娶宗女授右班殿直元祐中通判泗州太平州有慶湖

遺老集流寓吳中居昇平橋有企鴻軒郡志誤作醋坊橋  
卒葬宜興之篠嶺有二子口房曰廩房從方廩從回蓋寓  
父字于二子名也

蘇文忠畫竹石刻 宣和三年

右坡公畫竹二枝分刻兩石在沛縣歌風書院之吳公祠  
中有題記云東坡先生與叔祖山陽掾暨先大夫實同榜  
契雅相嘉重熙寧中守彭門叔祖通直赴約戲寫筇竹二  
枝曰觀此如何叔祖曰高節直幹此如學士立身許國于  
今四十餘年矣乃刻石傳久云宣和辛丑冬至日朝奉郎  
通判許州時豐口立石細審豐下缺一字是雙名按坡公  
集守彭城時有滕縣時同年西園詩五古一首或卽其人  
之父祖特無從攷其名號官爵耳

高平書院石刻

右殘石在溧水縣高平書院中俗名放光碑得之老庵土  
中康熙間有高僧圓堂駐錫庵中每至夜分見殿後光燄  
直起剎地得缺角石碑一面刻迦諾迦伐蹉尊者梵相左  
旁有廬陵歐陽四字右旁有能仁禪寺四字皆細書又一  
面上方刻劫在迷津等十三字下方黃山谷書題郭熙秋  
山詩皆斷缺不完碑高二尺許寬尺餘石質堅緻如靈璧  
山谷行書圓勁挺秀佛像白描精絕用筆如游絲似出龍

眠之手

米襄陽彌勒佛象贊

明人重刻本

右彌勒象并贊在淮安山陽城內棠雨庵上題云如來隨釋伽骨人不識彌勒佛米芾書按陳文燭跋語得襄陽佛象有高僧心澄能詩翰謂米守山陽時真筆也山人郭次甫促予勒石置寺中將與玉喬丹臺並永云云襄陽畫人物不可得見于石刻遇之亦墨林快事也

玉乳泉井闌題字

右玉乳泉三隸字陳堯佐書在丹陽北門外觀音山字徑七寸雄健古拙從未著錄按堯佐字希元其先河朔人後徙閩中官至太子太師致仕謚文惠好學善古隸能爲方丈大字凡名山勝處碑刻題榜多公親跡然滄桑兵燹之餘世不多見也

華陽洞魏中庸等題名

右題名六人在華陽洞頂正書無年月文云魏中庸方峻魏思文張瓌胡恢李仲寶十五字按方峻皇祐元年以朝奉郎太常博士爲句容令廉慎愛民重修孔廟入名宦傳張瓌全椒人洎孫字唐公英宗時歷知應天府河南河陽胡恢金陵人善篆隸韓魏公合篆太學石經官華州推官餘三人無可攷

華陽洞李迪等題名

天聖四年三月廿五日

右李迪題名在茅山華陽洞頂文云知軍府事李迪入內殿頭李保信同奉口詣三茅崇禧觀建立口口后受籙碑文修設齋口因謁靈祠徧遊勝口兼訪觀妙先生朱自英明真大師張紹英天聖丙寅歲季春二十有五日正書十四行字數不等按李迪字復古濮州人天聖三年知江寧府官至集賢殿大學士卒諡文定張紹英丹陽人仁宗時與觀妙宗師朱自英同被召稱疾不起賜號明真先生

陳夫人墓志殘石

右陳夫人殘墓志正書徑寸在西跨塘小庵中上下斷缺土人穴其中爲井欄文字剝蝕所可辨者第一行陳夫人墓志五字第二行從政郎新特差漳州八字似是撰文之人夫人諱淑貞九思之妹及二月甲申附其舅姑之兆于靈巖鄉云云以官職與文字論之定爲宋刻按宋史職官志政和末改從政修職迪功等階而寄祿之格始備從政爲從八品錄事叅軍縣令之階也此碑爲政和後人所立無疑

祈澤寺嘉惠廟牒

紹興二年

右祈澤寺嘉惠廟牒在上元縣祈澤寺龍女廟中額正書勅賜嘉惠廟牒六字中刻牒文下截題記歛云寶慶改元

七月日奉議郎知建康府上元縣王管勸農營田公事借  
緋趙時僑謹記牒後宰執押字者四人自左而右曰尙書  
左僕射同中書門下平章事者呂頤浩也曰尙書右僕射  
同中書門下平章事者朱勝非也曰叅知政事孟者孟庠  
也下注出使二字時命爲江東西湖東路宣諭制置使故  
也曰簽書樞密院事兼權叅知政事權者權邦彥也趙時  
僑嘉定十五年十一月到任至寶慶元年十一月任滿載  
上元縣廳壁記

寶鐵齋金石文跋尾卷下

元和韓崇

勅封白龍廟嘉惠夫人牒

紹興三年

右尙書省牒鎮江府金壇縣靈濟廟嘉惠夫人碑紹興三  
年八月牒在金壇縣南門外八里名白龍蕩祠內歷朝修  
建各碑已佚僅存此刻篆額勅封嘉惠夫人六字叅知政  
事席益孟庠時孟庠爲福建江西荆湖宣撫使至四年三  
月始召還故下注出使也時左右僕射爲呂頤浩朱勝非

禹迹圖

紹興十二年十一月

右禹迹圖繪山川州郡山水地名每方折作百里欵云元

符三年正月依長安本刊紹興十二年十一月十五日左  
迪功郎充鎮江府府學教授俞篋重校立石在鎮江府學  
高廣尺寸山川郡名與西安府阜昌七年劉豫所刻無異  
此云依長安本刊必宋以前有舊刻南渡後重摹立之學  
校以示諸生耳

無錫縣學記

紹興十六年

右無錫縣學記紹興十六年十一月朔旦左朝請郎主管  
台州崇道觀賜緋魚袋李彌正記并書左朝奉郎致仕喻  
樛篆額正書廿六行行四十八字字徑寸許篆額無錫縣  
學之記六字按李彌正連江人彌遜之弟官吏部郎兼史  
館喻樛字子才建炎三年進士紹興初授秘書省正字轉  
工部員外郎出知蘄州

勅封廣惠侯誥

紹興十七年

右勅封廣惠侯誥在溧水縣城隍廟中廣惠侯卽唐縣令  
白公季康也篆額勅封廣惠侯誥六字中載勅書下截題  
記欸云乾道三年歲在丁亥春正月庚子朔左朝奉郎知  
建康府溧水縣主管學宮勸農營田公事兼兵馬都監兼  
主管圩田賜緋魚袋李衡謹書牒誥必由尙書省施行執  
政例得列銜署姓故此碑秦檜之名一再列入也李衡隆  
興元年十月到任乾道二年十月再任乾道三年九月被

召見溧水縣廳壁記

句容縣重修夫子廟記

紹興廿四年

右宋句容縣重修夫子廟記紹興二十四年三月一日儒林郎新差充池州教授江賓王撰爲縣令龔濤修廟而作也文正書十九行行四十字下截每行磨滅一二字太師益國公下一字爲人鏟去乃秦字謂檜也紹興十七年檜改封益國公碑立于廿四年是歲加少傅封嘉國公在立碑之後龔濤字仲山東平人在官修舉廢墜首先學校見縣志名宦傳

清遠軍節度使少保王公神道碑

紹興廿四年

右少保王公神道碑左朝請大夫前知韶州軍州事主管學事賜紫金魚袋傅雱撰右中大夫直秘閣添差江南西路安撫司叅議官賜紫金魚袋楊口口書并題額在上元縣神策門外清真寺中正書五十五行行九十六字字如指頂大額題正書宋故贈檢校少保王公神道碑十二字其文六千餘言洋洋灑灑歷敘戰功皆與宋史列傳合文中所云武僖劉公乃劉光世也王德爲南渡功臣此碑又近在金陵城外而訪碑錄金石萃編金陵金石志俱不載可見古刻之顯晦有時而搜羅放失之不易也

宋徽宗賜道士項舉之手詔

右徽宗手詔令劉旣濟敦遣道士項舉之赴闕也在閭門  
崇真宮內按處州遂昌縣治南瑞山麓亦有石刻與此正  
同阮宮保兩浙金石志云項舉之字彥昇七歲爲遂昌紫  
極宮道士大觀庚寅往汴京九成宮會金明池旱應詔符  
召池中龍舉之挺劍結步池水卽湧溢有七巨魚浮水上  
如北斗之次兩隨沾足詔改紫極爲壽光宮賜殿額及田  
租政和丁酉召赴闕授紫虛大夫葆光殿較籍爵秩視朝  
散大夫壽光宮在處州遂昌縣南瑞山之麓劉旣濟爲兩  
浙勸農使處州在管下是以手詔令其敦請至紹興甲戌  
其徒孫鄭子華知平江府崇真宮事重摹一石置于吳中  
藉以述祖德而垂永久也

### 北寺塔甄

右北寺塔甄文云大宋國處州松陽縣久智鄉第□□□  
□居住今寄平江府吳縣利娃鄉白礮橋北章家巷街□  
□居住弟子楊公遠妻鄧氏九娘男彥恭彥□□婦邵氏  
廿五娘孫女六二娘發心捨塔甄逐層結緣功德報答四  
恩三有法界眾生同成佛果此甄亦出報恩寺塔中完善  
無缺爲養育里汪氏所得僕藏王億年宋敦仁二甄殘缺  
不全文難貫穿與紹興乙亥甄同時得於塔中也

### 北寺塔甄



右造塔宋甄得于北寺瓦礫中陽文下截斷缺文云平江府長洲縣樂安下鄉靖州軍事推官張廷傑男國學學諭進士聖任重建寶塔六層云云按張聖任領紹興庚午鄉舉與范文穆同榜見吳郡鄉舉題名碑舊塔十一成元豐時經火復新蘇文忠捨銅龜以藏舍利宣政間復燬紹興初行者大圓重建塼文後署紹興下殘字似乙當是乙亥爲紹興二十五年也

瑞光塔甄題字

右甄文在瑞光寺塔中正書四行文云吳縣太平鄉木竇鎮廟橋西街南面北居口女口口顧氏五二娘捨甄柱一口追助先考顧十七郎妣張氏六娘亡夫趙口郎眾魂超升雖無年月其字跡稱謂與北寺所得紹興磚無異惟彼屬陽文此爲陰款按瑞光塔修于宋勅其爲宋物無疑

宋高宗賜韓蘄王勅殘石

右宋思陵賜蘄王勅殘石文云虎皮囊鞬一副弓五張至可領也十三字末一御押向在道山亭載於郡志年久散佚道光丁酉春滄浪王僧達受得於南禪寺敗垣下按前明正德間郡人沈潤卿鈕圃得高宗賜岳武穆勅書石刻以墨本贈沈石田其時吳匏庵祝枝山文衡山諸君子皆有題詠與此事絕相類古物沈壅積久必顯惟不遇其人

多磨滅于斷垣零甃間耳

焦山陸放翁題名

隆興二年閏月

右陸放翁題名在焦山浮玉岩正書十行五十八字云陸務觀何德器張玉仲韓无咎隆興甲申閏月二十九日踏雪觀瘞鶴銘置酒上方烽火未息望風檣戰艦在煙靄間慨然盡醉薄晚泛舟自甘露寺以歸後行楷題二行十五字云明年二月壬午園禪師刻之石務觀書隆興二年甲申放翁年四十通判鎮江府時莆陽守韓元吉省親京口相與道故有京口唱和集放翁爲之序按鎮江府志載元吉字无咎號南澗許昌人維四世孫官至吏部尙書有南

澗甲乙集

溧水縣重建正顯廟碑

乾道元年

右正顯廟碑左承議郎提舉兩浙路布帛王端朝詞并書乾道元年冬十一月甲子左朝奉郎知縣事李煥立石在溧水縣城隍廟中分書廿二行行四十字篆額重修正顯廟碑六字陽文城隍神爲白公季康唐元和間爲溧水令終于任所民尸而祝之卽縣治爲祠紹興十年李公朝正宰溧水有所必獲以聞于朝錫廟額曰正顯按白公太原人父麟爲揚州錄事母夢感白蛇而生始任華州下邳尉及溧水已四爲令矣從子居易墓志有云才不遇時道屈

于位命矣李朝正字治表紹興間知溧水縣有異政秩滿  
民泣留葉夢得薦于朝後官至戶部侍郎王端朝字季羔  
澶淵人少好學歷官至承德郎南渡後家于溧水

鳳圖贊

乾道二年

右鳳圖贊文云有道則見鳳阿爲藏儀韶鳴岐千載相望  
□□之哀歌聞□□德備□□覽輝其翔乾道二年熊克  
因閱漢碑取麟鳳二石圖而贊之刊于京口後有嘉定己  
巳一題磨泐已甚不知爲誰作石在鎮江府學訓導署之  
廳壁上截鳳圖下截題贊分書字徑二寸許按鎮江府志  
乾道壬辰潤州教官熊克閱漢碑取麟鳳圖于學宮其後  
陳德一易之以石嘉熙中劉卿月補刊龜龍龜龍久廢惟  
麟鳳存今麟圖不見不知毀于何時僅存鳳圖片石而已

靈巖山石幢題字

乾道九年

右石幢文云乾道九年十一月十三日住當山佛慧大師  
善卿建在靈巖山麓下截尙有細字十行磨滅不辨大約  
邑人建幢報父母恩者後年月一行尙可識讀係乾道九  
年拾月日弟子等字按數字以點畫多者代書相傳爲武  
后所改其實非也顏子不貳過孟子市價不貳易之參天  
兩地漢書及漢碑以壹代一者不可勝數不能究其起自  
何時也

宋周簡惠公神道碑 清熙四年

右宋資政殿大學士贈太傅毘陵侯簡惠周公神道碑少  
傅觀文殿大學士致仕益國公食邑一萬三千六百戶食  
實封五阡戶周必大撰中大夫守國子祭酒兼玉牒所檢  
討官兼權中書舍人張口書朝請郎守起居舍人兼權直  
學士院兼權中書舍人邵文炳題口在宜興北門外十五  
里保安寺內正書四十五行行一百十四字文中敘歷官  
出處甚詳清熙改元正月十二日薨于里第享年七十有  
七後以子升朝累贈太傅爵毗陵侯娶李氏四男孫十二  
人按宋史本傳周葵字立義宜興人宣和中登甲科調徽  
州推官臨安教授殿中侍御史阻張浚北伐罷爲司農少  
卿改湖南提刑和議成召爲太常少卿出知湖州移平江  
秦檜死遷直秘閣權禮部侍郎國子祭酒復出知信州及  
太平州孝宗卽位除兵部侍郎拜叅知政事以資政殿學  
士提舉洞霄宮尋起知泉州告老加大學士大略與神道  
碑同

周師成等題名 開禧二年

右題名文云周師成主吳縣簿倪祖義訪之因同遊開禧  
丙寅十月十三日在虎邱可中亭側磴道石上六行行四  
字正書前人俱未採錄卽近日任惺齋虎邱志亦未載入

吳郡壽寧萬歲禪院記 紹熙元年

右壽寧萬歲禪院記紹熙改元仲春日日當山住持傳法  
蒙衲妙思記郡人鄉貢進士經炳文書壽寧萬歲禪院卽  
今之雙塔寺也文云唐咸通中州民盛楚始建是院於北  
苑東南名曰般若吳越錢氏改爲羅漢院國朝雍熙中州  
民王文罕文安文勝重建殿宇及磚浮圖兩所至道改元  
太宗皇帝賜御書四十有八卷寺僧遇興申請於朝錫今  
額云云文十九行行廿八字額題吳郡壽寧萬歲禪院之  
記十字兩行皆隸書在郡中雙塔寺殿壁間有穿有暈仿  
漢碑式製作極工迄今六百餘年無纖毫損缺信乎神物  
護持也

華陽洞游九言題名 慶元元年

右刻在華陽洞頂正書三行文云游九言道士易如剛華  
陽洞慶元乙卯書按游九言字誠之建陽人筮仕古田尉  
開禧中知光化宰充荆鄂宣武叅謀官端平中特贈直龍  
圖閣諡文靖有默齋遺稿

宋定城令趙君墓志 嘉定八年二月

右宋定城令趙君墓志趙君名用會祖伍祖慶孫父思俱  
書官闕子勳勞勢初任從事郎終于光之定城令其文以  
子述父質實有法楷法亦仿歐體相傳許墅學宮後古墓

稱趙王墳前明權使方公創建義塾碑記載宋定城令未詳姓氏嘉慶丙子陸茂才廷燦董尊義塾并修古墓于土中得此銘椎拓數紙仍埋塚中趙君世系官閣載之甚詳攷宋史宗室世系表各以一字別其昭穆均係二名趙君非宗室明甚可以證流俗傳聞之謬也

句容縣學五瑞圖碑

紹定二年

右五瑞圖碑在句容縣學篆額句容五瑞之圖六字中刻靈芝兩岐麥同本竹及連蒂瓜蓮一截劉宰作記蓋為縣令張侷作也按侷邢城人寶慶一為句容令勤政愛民紹定元年開放生池築亭作記是有五瑞產于縣境邑人做漢人題池故事而作此碑劉宰字平國金壇人紹興元年進士江寧尉真州司法韓侂胄柄國不復仕號漫塘病叟寶慶初除將作監進敷文閣知益國府不拜卒謚文清

蘇文忠斬蛟橋題字

紹定三年

右蘇文忠斬蛟橋題字云晉征西將軍周孝侯斬蛟之橋十二字正書四行行三字字徑四寸下有紹定庚寅謝采伯題記按楊懷遠鄉評備考云康熙戊戌己亥間濬城河斷碑復出現藏周侯祠蓋崇寧禁錮沈石水中故多缺損今弄長橋南逸左首小屋內

宋陳孺人地契 紹定六年

右陳孺人地契文云大宋國江都縣太平鄉北里方陵前  
埋居在宋故陳氏二孺人今將錢財九万九千九百九十  
九貫就皇天父后土母三十八將靈祇等眾買得丁地墳  
山卽日錢財天地神明交過口足見人東王公西王母保  
人張陸李庭書契人石功曹度書契人金玉簿度書契人  
壽萬年執書契人入黃泉急急如律令道光己亥甘泉縣  
北湖僧道橋東阮氏萬柳堂前耕地得此刻於方磚徑一  
尺兩面有文一面刻地契十三行行十五字一面四旁刻  
八卦中刻云券文一道給付亡人陳氏二孺人永爲執照  
紹定六年十二月二十七日給者三十字五行皆正書按  
地契卽太康蒞之遺意一名地券雖俚俗可笑亦有所自  
也

宋周公墓記 淳祐三年

右周公墓記子行簡撰文云公維揚方陵也乾道二年歲  
次丙戌二月二十六日亥時生卒于淳祐二年壬寅十一  
月三十日享年七十有七娶陳氏生男二人長宗魯次卽  
行簡卜癸卯年十口口口甲申奉公柩祔葬于母陳云云  
方石徑尺十四行字數不等缺一左角少三十餘字與陳  
孺人地契同出甘泉北湖阮氏萬柳堂前土中周公卽陳

孺人之夫死後合葬其子爲墓記云

報恩寺井欄題字

咸淳二年

右宋井欄題名文云咸淳二年口口建石橋置此口監莊  
比丘福基立首行次行六字三行七字在金陵報恩寺訪  
碑錄所未載道光庚子李月汀觀察拓以見贈首行末疑  
創字次行疑井字也

城隍廟顯應閣記

咸淳四年

右顯應閣記在溧水縣城隍廟中正書廿三行行廿六字  
知溧水縣周成之撰知彭澤縣趙卯發書軍器監丞繆元  
德題蓋篆書顯應閣記四字城隍神爲唐縣令下邳白公  
廟祀始于會昌四年宋元符間重建元祐四年勅建徽恩  
閣紹興十年李朝正知縣事請于朝賜額正顯建正顯殿  
景定元年署縣事趙介如闕西廡建祠祀神子居中執中  
敏中姪居易表曰有唐文獻之祠至咸淳二年邑人復建  
顯應閣而縣令周公爲文記之云

亨泉井欄詩記

咸淳四年

右亨泉井欄詩記一面亨泉二大字一面刻記六面刻詩  
末行云咸淳戊辰任山明叟立開山惟一闢路景陽空谷  
云云在郡城杉瀆橋南大街記文字畫甚細磨泐已甚可  
識者惟首行城府城利娃鄉數字而已按淳祐八年東禪



寺林酒仙詩歷陽張卽之爲寺僧惟一書卽此開山僧也

尋仙館三清殿記

咸淳九年

右尋仙館三清殿記宣教郎知建康府溧水縣王管勸農營田公事兼兵馬監押兼主管圩田兼弓手寨兵軍正盧國慶記迪功郎建康府溧水縣縣學主學袁僑書修職郎建康府溧水縣丞王公立題蓋在溧水縣尋仙觀中正書廿二行行四十一字篆額勅尋仙觀新建三清殿記十字尋仙觀在縣東南四十三里仙杏山梁建有石壇古山門基仙人蹟洗眼池諸蹟唐垂拱間道士宋文幹立仙壇三所聖歷二年縣令岑仲珩石爲像宋宣和中建三清殿咸淳七年重修

平陵書院湖石題字

右蒼雲二篆字徑六寸鏤于湖石在溧陽縣平陵書院按邑志趙府三石在察院廳事後者曰蒼雲石上有金字篆刻在鳳凰橋洲上者曰高靜石俱傳是宋高宗書則亦內院之物以賜丞相者又金淵書院之忠義石云云丞相趙葵也別業名晚香堂在縣南其從子淮宅在縣北時號南北二府

劉宰殺虎行殘石

右劉宰殺虎行殘石在宜興周孝侯廟中七言古詩前半

已缺末題漫塘叟劉宰旣爲宜興大夫賦殺虎行十五字其尾亦不全僅存行書十五行字數不等按劉宰號漫塘其出處載句容縣學五瑞圖碑跋尾中考縣志趙與哲寶慶中知宜興縣境內多虎患與哲悉殲之金壇劉宰爲賦殺虎行曰君不見陽羨周將軍射殺南山白額虎千古萬古流聲聞又不見宜興趙大夫南山三十有六虎令行殺取無復餘一虎昔何少三十六虎今何多虎多人不患所患政之苛苛政滅人門猛虎戕人命擇禍莫若輕泰山之人論已定大夫性高明下令走風雨所知在田里了不見臺府旣令民免政之虎又與民除虎之苦四境之民歌且舞或云殺虎太傷和胡不令渠自渡河我聞此言笑且阿大夫憂民憂豈必限吾土不然隣國以爲壑信也白圭愈于禹古陽羨今宜興大夫邑之王將軍邑之賓王賓多寡事不同千古萬古同清芬此詩卽末行所云爲宜興大夫所賦殺虎行也當時自必刊石不知何時佚去而此碑不全之詩不載邑志無從考其首尾惜哉

朱文公書繫辭

右朱文公書繫辭易有太極至是故易逆數也文公書蔡元定刻在徐州呂梁洪川上書院字大五寸十四行行八字蔡元定元刻在常德府學嘉定縣學亦有明人重摹本

此碑雖刻手不精遠遜原石重爲文公書當懸諸座右爲  
仰止之一助

宋重刻瘞鶴銘殘字

右宋人重刻瘞鶴銘在焦山浮玉岩下半爲明人題名鏤  
損僅存五十四字按周公謹雲煙過眼錄載太平州有重  
刻本是刻未經前人著錄未審與太平州刻何如而字體  
圓勁奇古斷爲宋人精摹夫復何疑

焦山浮玉二大字

右刻浮玉二字汴趙孟奎書在焦山崖上字徑二尺正書  
孟奎字文耀號香谷寄貫蘇州太祖十一世孫寶祐四年  
文天祥榜進士忠惠公與籌子也官至秘閣修撰平生集  
分類唐歌詩一百卷自序言凡一千三百五十三家四萬  
七百九十一首可謂廣矣惜乎世無全本葉文莊僅得二  
十七卷毛子晉汲古舊藏亦不過十冊今之藏書家并名  
目亦不知矣

海州鬱林觀宋四士題名

右題名在鬱林觀東壁文云宋四士嘗登山石林虞仲子  
水石草堂道人無礙居士芝臺翁計大小廿四字前一行  
六字篆書字廣四寸長七寸後四人每人爲一行行書字  
徑五寸按題名無年月篆書宋四士嘗登山蓋在金元間

宋之遺民所題故隱其姓名篆法古勁行書亦佳

清涼院尙書禮部牒 大定三年

右尙書禮部牒云滕陽軍沛縣口慶演口在城隍巷未有  
名額今有孟端納過口口請到院額施與慶演乞立院名  
勘會得實須至給賜者大定三年四月額題正書勅賜清  
涼之院六字下截題記已漫滅不計字數在沛縣舊城廢  
寺壞牆下其陰爲忠顯校尉周忠等造象題名按沛縣唐  
屬徐州金改屬邳州後屬滕州故有滕陽軍之名

獅林寺前井欄題記 大德十年

右井欄題記在獅林寺前字小如豆不甚剝泐宋元井闌  
似此完善者絕少其文云湖州路長興州至德鄉施三章  
廿九丁十八母丁七五郎丁五八母丁七三郎丁壽口郎  
名下同妻顧氏同施淨財開義井功德各家保扶身宮康  
泰壽算增崇者大德十年十月日幹緣東昌路興福院僧  
德海按施三皆長興人當是流寓吳中者不曰幾娘而曰  
某母某氏稱謂漸流于俗此亦宋元所罕見身宮俗作躬  
字者多此作宮頗通文義

元鎮江府學銅豆 大德十一年

右銅豆款識四行行六字篆書文云元大德丁未中順大  
夫鎮江路總管提舉學校史燦山長曹鑑二十四字向在

學中不知何年轉入焦山枯木堂中丁未爲成宗在位之  
十一年按元史列傳曹鑑字克明宛平人大德五年爲鎮  
江淮海書院山長官至吏部尚書謚文穆史燦不見于列  
傳當檢郡志博考之

句容縣重建學記

至大二年五月

右建康路句容縣重建學記翰林學士承旨中奉大夫知  
制誥兼修國史王構撰承德郎江南諸道行御史臺監察  
御史潘汝劼書并篆額句容令趙靖重建縣學作記頌其  
德政也在句容縣學中正書廿行行三十八字篆額建康  
路句容縣重建學記十字按趙靖至大間爲句容令上司

常歲科紅花靖力辭以爲非土產獲免見縣志名宦傳王  
構字肯堂東平人由國史院編修官至翰林學士承旨卒  
贈大司徒謚文肅成宗時參議中書省有上書請搜括江  
南田賦者構與平章事何榮祖共持不可乃止

元集仙宮倒插竹圖并詩

皇慶元年

右集仙宮倒插竹圖并詩七言古一首欵題元真子三字  
行書十五行行十四字在嘉定集仙宮瑞竹記之陰上畫  
竹下刻詩篆額集仙宮倒插竹六字枯竹一株節間細書  
倒插竹三字旁列新竹六七竿有兩處題字曰三年竹四  
年竹元時集仙宮道士孫應元嘗于齋前倒插竹一枝已

而得活三四年後竹遂成林因以瑞竹名其軒於是有記  
有圖有詩元真子不知何人大抵當時羽流也

元集仙宮瑞竹記

皇慶元年

右瑞竹記首行題平江路嘉定州集仙宮瑞竹記後題皇  
慶元年歲次壬子炳月望日冲靖守正凝和法師住持提  
點孫應元立石天師正一教主太素凝神廣道明德大真  
人王領三山符籙領江南諸路道教事口口光祿大夫留  
國公張與材監行書十二行行三十字額題瑞竹記三字  
楷書在嘉定縣集仙宮不言撰書人姓名與東嶽行祠記  
同時建立亦出留國張公手無疑按書史會要天師張與  
材字國梁號薇山別號廣微子封留國公作大字有法草  
書亦佳

趙文敏書歸去來詞

延祐五年

右趙文敏書歸去來詞欵題松雪道人書延祐戊午九月  
門生崑山顧信善夫摹勒上石在鎮洋縣學字大四寸首  
尾廿四行字數不等道勁古拙得瘞鶴銘筆意爲暮年最  
佳書也顧信字善夫崑山人初爲浙江軍器提舉以能書  
稱從趙文敏游得其書必鑄于石作亭扁曰墨妙晚年號  
樂善處士

創建洪福院記

延祐六年

右創建洪福院記潼川陰平野釋永全書丹篆額并撰在  
贛榆縣城外七十里班里莊正書廿七行行五十二字字  
徑一寸篆額創建洪福院記六字碑末題名自左而右贛  
榆縣至陰陽學正凡八行據土人云此碑于康熙四十年  
間爲震雷擊碎僧人拾殘石按其文字砌而合之石旣殘  
缺破處可容拳小亦容指視之透漏未幾石自長合後數  
年完好如舊字跡亦鈎畫俱出此鄉壁間故神其說然理  
之所必無爲事之所或有姑妄聽之可耳

東嶽廟鎮鑪銘

泰定元年

右鎮鑪銘正書陽文云浙西道平江路在城居奉道信

士王天祥上侍父親王伯明母親徐氏五娘情旨發心施  
財命工鑄造大方香爐壹座捨入元妙觀東嶽行宮永充  
供養專祈保庇父親母親壽齡綿遠福慧增崇次冀天祥  
室人周氏妙真身心康裕所求如意者泰定甲子年正月  
吉日置此鑪向在元妙觀東嶽神座前欸識爲丹漆漫滅  
道光三年大殿鼎新漆工姚雲亭磨而出之古金中鍊器  
最易消鎔大安寺鎮鑪光孝寺鉄塔晉祠鍊人外不多見  
也

重修天王寺碑

泰定二年

右重修天王寺碑前道一書院山長新安胡炳文撰承務

郎建康路句容縣尹程恭書江南諸道行御史臺監察御史張季修題額在句容縣南門外天王寺中隸額重修勅賜天王寺記八字文行書廿行行三十七字後有中峰和尚題記并說偈云天王數百年香火昔有牛頭闡化機異日移文上金石仁看賢聖自相依云云撰文胡炳文字仲虎學者因其自號稱雲峰先生見元史儒學傳

無想寺招雲亭記

至順二年

右招雲亭記在溧水縣城外無想寺中至順辛未二月春陽夏謝瑛記橫石廿五行行十八字行書按縣志寺在邑南十八里贊賢鄉未審矧于何時相傳唐武德時重建宋咸淳間僧道甄復興大刹請于朝賜名禪寂寺門外有唐時古柏寺西有南唐韓熙載讀書臺寺後有招雲亭元至順間所建也

天王寺重建山門記

至順三年

右句曲浮山重建山門記前鎮江路丹陽縣儒學直學王行簡撰并書將仕郎常州路總管府知事白賁篆額在茅山天王寺行書十八行行三十四字篆額句曲天王寺重建山門記十字按天王寺始于唐中和間伽藍神顯大神通遠近百里禱水旱疾病如響咸以伽藍神卽毘沙門天王聞于朝錫今額天祐二年詔天下無額寺皆毀此寺因



額獨存宋至道二年詔改天祐寺元符間重新南渡後金兵沿江縱火將及寺殿中忽湧水如注泥像觀世音兩眼如泣金人駭懼火遂止大德丁酉僧行超創修大殿及僧堂厨舍歲久山門地毀至治二年重建至順三年作記立石焉

重建白雲崇福觀記

元統元年

右重建白雲崇福觀記奎章閣大學士翰林學士承旨銀青榮祿大夫知制誥兼修國史中書平章政事魯國公趙世延謨文前翰林待制承務郎兼國史院編修官楊剛中書丹奎章閣侍書學士翰林侍講學士通奉大夫知制誥同修國史虞集篆額在茅山中官西白雲觀中正書廿六行行五十一字篆額重建白雲崇福觀記八字白雲觀者因嶺上白雲而名宋高孝時王虛靜舊隱處也至是重建爲文記之按趙世延字子敬其先雍古族人居雲中元世祖時官雲南按察司判官天歷二年拜中書平章政事封魯國公改封涼國公贈太保諡文忠虞集字伯生大德初薦授大都路教授文宗時除奎章閣侍書學士贈江西行中書省參知政事封仁壽郡公諡文靖楊剛中字志行上元人官翰林待制爲文奇奧書法規模吳興有霜月集行世

琵琶橋井闌題字 至元三年

右井闌題記文云至元三年丁巳仲春吉日眾口正書一行下一字磨滅丁字下當是丑字乃順帝至元三年也按游墅關志琵琶橋在金墅蓮花寺前以指爪爬石作琵琶聲又有九龍樹唐人所植

句容縣學制詞記 後至元四年五月

右句容縣學恭刻制詞記宣聖五十四代孫承德郎江南諸道行御史臺監察御史孔思立書通奉大夫江南諸道行御史臺侍御史張起巖文并篆額在句容縣學正書廿五行行三十九字篆額恭刻制詞之記六字傍鐫麟鳳按張起巖字夢臣章邨人中延祐乙卯進士第一同知登州改集賢修撰監察御史拜翰林承旨學士充宋遼金三史總裁官卒諡文穆著華峰漫稿華峰類稿金陵集行世孔思立元史無傳按仁宗時衍聖公孔思晦為孔子五十四世孫思立乃兄弟行也

宜興英烈廟殿記 後至元四年

右英烈廟新殿記承德郎平江路總管府推官汪澤民為文并書中順大夫江南諸道行御史臺經歷秦不華篆額在宜興周孝侯廟中正書廿三行行三十九字字徑寸許篆額英烈廟新殿記六字末云至元再元之四年春三月

壬寅造奉祠道士林德昌立石里人錢德潤鑄按汪澤民  
字叔志婺源人延祐五年進士授同知岳州平江府事至  
正三年召赴闕除司業遷集賢直學士以禮部尙書致仕  
追封譙國公諡文節宋潛溪稱其爲文不事繪飾尤以善  
書名家泰不華字兼善年十七江浙鄉試第一歷官浙東  
道宣慰使追贈江浙行省平章事封魏國公諡忠介

句容縣重建達奚將軍廟碑 至正二年正月廿二日

右達奚將軍廟碑承事郎前集慶路句容縣尹兼勸農事  
林仲節撰文進義副尉集慶路句容縣王簿樊嗣祖書并  
篆額在句容縣南門外將軍廟中正書文廿四行行三十  
八字篆額重建達奚將軍廟之碑九字三行文云達奚本  
蕃族蓋因達山奚水得姓魏隋間著姓西北今將軍獨以  
姓顯而名號世載蒐有記之者世傳南來時與沈襄王戰  
死于縣西之華墓崗其後民懷思而廟祀之有禱必應云  
云按沈襄王卽沈法興達奚氏後魏獻帝第五弟之後爲  
代北著姓見于史者不一惜乎將軍名字事蹟皆不可考  
而知也

方山重修上定林寺記 至正五年

右方山重修上定林寺記前奎章閣侍書學士翰林侍講  
學士通奉大夫知制誥同修國史虞集撰資善大夫湖廣

等處行中書省左丞王士宏書正奉大夫江南瀾西道肅  
政廉訪使普顏帖木兒篆在上元縣方山定林寺中正書  
廿五行下層已磨滅約計字數每行四十八字篆額方山  
重修上定林寺記九字按定林寺有二上定林寺舊在蔣  
山應潮井後宋元嘉十六年禪僧竺法秀造在下定林寺  
之西乾道間僧善鑑請其額于方山重建下定林寺在蔣  
山寶公塔西北王安石讀書處也方山在城東南四十五  
里形如方印一名天印山

句容縣儒學重修記 至正八年五月

右縣學重修記正議大夫中書工部尙書高昌傑哲篤讓  
從仕郎贛州路龍南縣尹兼勸農事中山李桓書并篆額  
縣尹張承務士貴重修縣學作記以述其功德也在句容  
縣學行書十八行行廿九字篆額句容縣儒學重修記八  
字張承務字士貴邯鄲人爲句容縣令多善政入名宦傳  
李桓字晉仲鄉貢士官江浙儒學副提舉以文鳴江東書  
法雄渾邁勁入縣志文學傳傑哲篤字世南其先回紇人  
廉訪使玉立弟登延祐二年進士僉廣東道肅政廉訪司  
事被劾寓居溧陽後歷官至工部尙書叅知政事此碑文  
極嚴整歌頌亦典麗元文之傑出者

張仕觀橋題記 至正九年十一月

右張仕觀橋題記正書四行文云時大元至正九年歲在己丑仲冬吉日建勸緣前光福教寺住持溪雲從一募緣施財前常州善權禪寺住持允迪募緣施財里士北溝樂安孫友仁云云又一石鐫捨財姓氏在光福張士觀橋橋洞內道光戊戌閏月偕顧上舍沅入山時方修葺二碑橫卧道旁上舍解衣磅礴親事椎柘並欲輦至光福寺以垂永久其耆古好事之風古人何多讓焉

常熟州修學記 至正廿二年二月 無額

右常熟州修學記臨海陳基撰并書鄱陽周伯琦篆至正廿二年守禦元師兼知州事海陽盧鎮重修州學立石以頌其德政也在常熟縣學正書廿二行行四十一字字徑寸許陳基字敬初始爲江浙行中書省郎中淮張爲太尉叅謀軍府事遷學士院學士一時書檄碑銘傳記多出其手後事明太祖預修元史洪武二年卒于常熟寓舍所著有夷白齋集周伯琦字伯溫爲翰林修撰招諭平江張士誠拜江浙行省左丞留平江者十餘年工篆隸嘗著六書正訛說文字原二書

秀峰寺重興修造記碑

右秀峰寺修造記奎章閣學士院鑒書柯九思撰郡僧普慈書郡人祖顛篆題正書十六行行三十二字碑首斷缺

篆額僅存修字半邊在城西南七十里西華鄉秀峰寺中  
寺僧舊藏至正七年賜法號聖旨墨蹟完好如新又刻本  
明永樂五年十月盤龍勅文一道上有朱印廣運之寶亦  
可攷見明代度牒之制

金粟道人小像

右金粟道人石刻小像自題絕句云儒衣僧帽道人鞋天  
下青山骨可埋若說向時豪俠處五陵鞍馬洛陽街雲林  
子書贊末題戊戌八月法喜精舍北樓云云其下尙有王  
輔銘及雙石居士題詩其像踞坐石牀手執羽扇旁植蕉  
石神氣閒雅石在嘉定周氏祠內康熙中爲王補亭輔銘  
所得長洲顧上舍沅近得一石于范文正祠與此畫像題  
字尺寸皆符亦相傳五像中之一也

倪雲林小像

右雲林小像上方鐫王仲光所撰墓志正書小楷上缺一  
角磨泐數字下方小像趺坐木榻手執幅巾几上陳鐘鼎  
卷册數事奚童侍女左右夾侍刻工精妙尙在嘉定王氏  
今與金粟道人像並歸周氏祠中

宋龍洲先生劉公墓表

右宋龍洲先生墓表江西儒學提舉楊維禎撰杭州路海  
寧州判官褚奐分書在崑山馬鞍山麓文云先生名過字

改之廬陵人宋南渡後以詩俠名湖海間宰相周必大欲  
客之不就故人潘友文宰崑山縣延致先生其卒也縣主  
簿趙希懋葬之馬鞍山立祠東齋久而墓與祠俱廢至正  
十三年州人顧瑛秦約盧熊等聞之州復其墓且表封焉  
云云文多磨滅下半石已殘缺以朱珪名蹟錄補之庶貫  
串可誦又一面分書大字二行云宋故龍洲先生劉君諱  
過字改之墓

